

Ályktunartillögur – Aðalfundur lækna ráðs Landspítala vorið 2011

I. Fjárveitingar til reksturs Landspítala

Landspítalinn er stærsta heilbrigðisstofnun landsins og aðalsjúkrahús lögum samkvæmt. Landspítalinn veitir almenna sjúkrahúspjónustu fyrir íbúa höfuðborgarsvæðisins og sérhæfða sjúkrahúspjónustu fyrir alla landsmenn. Auk þess er Landspítalinn aðalkennslusjúkrahús landsins og stærsti vettvangur rannsókna innan heilbrigðisvísinda. Landspítalinn hefur þannig algera sérstöðu á landsvísi og getur ekki vísað neinum sjúklingahópum frá. Stjórnvöld verða að hafa þessa sérstöðu spítalans í huga þegar fjárveitingar eru ákveðnar.

Uppsöfnuð rekstrarhagræðing á Landspítalanum undanfarin þrjú ár er um 20% að raungildi. Starfsfólki og sjúkrarúmum hefur verið fækkað verulega og meðallegutími hefur styst.

Það er álit lækna ráðs Landspítala að lengra verði ekki gengið í niðurskurði á fjárveitingum til Landspítala án þess að minnka verði þjónustu við sjúklinga enn frekar og skerða öryggi þeirra. Lækna ráð Landspítala hvetur stjórnvöld því til að leita annarra leiða til sparnaðar í rekstri ríkisins en að ákveða frekari niðurskurð á Landspítala

II. Skortur á læknum

Undanfarin þrjú ár hafa fjárveitingar til íslenska heilbrigðiskerfisins dregist umtalsvert saman með tilheyrandi þjónustuskerðingu. Ein birtingarmynd þessa niðurskurðar er að erfitt er orðið að manna lausar stöður lækna, bæði í heilsugæslunni og á sjúkrahúsum. Læknar hafa varað við þessari þróun. Lækna ráð Landspítala skorar á yfirvöld heilbrigðismála að taka höndum saman við fagfélög og samtök lækna til að finna leiðir til að snúa þessari óheillaþróun við. Framtíð íslenska heilbrigðiskerfisins er í húfi.